

## Schuss durch bedds de Backe

von Johannes Toups

Kantebusch Will, von de angere Rhiensieh, hadd von sin aide Tante en Lotum e klee Burehöffke öwemohme.

Hä woer e fliesisch on e jefallisch Bürke. Wenn ömmes Hölp bruggde, Will stong enuner paraat.

Sonndaars Morjes jeng hä noer de Hommes, on dann möt sin Stammdööschrönde no-rem Frühschoppen. Be so manches Bierke joof et do emmer voll te lache, denn Will könnt emmer schön on losstisch vertälle.

Et dühde net lang, on Will feng ahn möt sin Vertällekes. Wie hä em Kreesch, möt en Verwundung, en Russland em Feld-Lazarett je-

lääje hadd. Tesaame möt sinne Kamerood Engelbert, e Kaplönsche ut derr Kohlepott.

Engelbert hadd en fiese Verwundung an de Battze. Man hadd em en de Fot jeschoote. Dat Kaplönsche woer all daarelang am öwerlääje, wie hä dat sinne alde Pastur te Huus schrieve solde. Hä deng sech schwoor on vong net de rischtije Wööt.

Will säht, do harm ech däm ärme Kähl enne Vüürschlach jemäckt: „Schrief einfach, liesch hej em Feld-Lazarett möt en Verwundung, Schuss durch bedds de Backe, Jesecht äwer onverletzt!“